

PWYLLGOR PENSIYNAU DYDD LLUN, 7 GORFFENNAF 2025

Cynghorwyr:

Stephen Churchman, Goronwy Edwards (Cyngor Sir Bwrdeistrefol Conwy), John Brynmor Hughes, R Medwyn Hughes, Iwan Huws, Ioan Thomas a Robin Williams (Cyngor Sir Ynys Môn)

Swyddogion:

Dewi Morgan (Pennaeth Cyllid), Delyth Jones-Thomas (Rheolwr Buddsoddi), Meirion Jones (Rheolwr Pensiynau) a Lowri Haf Evans (Swyddog Gwasanaethau Democratiaeth)

Eraill a wahoddwyd:

Ned Michael (Bwrdd Pensiwn – arsylwi)
Osian Roberts (Archwilio Cymru)

1. YMDDIHEURIADAU

Dim i'w nodi

2. DATGAN BUDDIANT PERSONOL

Dim i'w nodi

3. MATERION BRYD

Dim i'w nodi

4. COFNODION

Bu i'r Cadeirydd dderbyn cofnodion y cyfarfod a gynhaliwyd ar 12 Mehefin 2025 fel rhai cywir.

5. DIWEDDARIAD PARTNERIAETH PENSWIN CYMRU

Amlygodd y Rheolwr Buddsoddi bod yr adroddiad bellach yn un rheolaidd sy'n cael ei gyflwyno i'r Aelodau yn nodi'r wybodaeth ddiweddaraf ar waith PPC ynghyd a'r hyn a benderfynwyd ynn nghyfarfod mis Mawrth o'r Cydbwyllgor Llywodraethu (corff sydd yn gwneud penderfyniadau dros y Bartneriaeth ble mae Cadeirydd pob cronfa yn eistedd arno). Tynnwyd sylw at y ffaith bod y Bartneriaeth wedi ail benodi Hymans Robertson fel cynghorydd goruchwylio (oversight advisor) a Robeco fel darparwr pleidleisio ac ymgysylltu.

Cyflwynwyd hefyd ddiweddariad ar y cynllun hyfforddi, y cynllun busnes a'r gofrestr risg ynghyd a diweddariad y gweithredwr oedd yn amlygu'r holl gronfeydd sydd gan y Bartneriaeth wedi'i sefydlu. Cyfeiriwyd at fanylder gwaith y

gweithredwr dros y cyfnod ac at unrhyw amodau'r farchnad sydd wedi cael eu monitro ganddynt. Tynnwyd sylw at ddadansoddiad fesul is-gronfeydd o'r perfformiad gan nodi bod perfformiad y cronfeydd ecwiti byd-eang wedi bod yn gryf ar marchnadoedd incwm sefydlog wedi llusgo.

Cyfeiriwyd at y gwaith 'Addas i'r Dyfodol' lle atgoffwyd yr Aelodau iddynt gymeradwyo gofyniad i greu cwmni buddsoddiad IMCo a symud y prosiect ymlaen. Ategwyd bod y Cyngor Llawn hefyd wedi ei gymeradwyo ar y 3ydd o Orffennaf 2025, gyda disgwyliad y bydd wyth Cyngor y Bartneriaeth wedi cymeradwyo'r gofyn erbyn diwedd y mis. Bydd y gwaith o sefydlu'r cwmni yn digwydd dros yr Haf er mwyn cyrraedd y dyddiad targed o 31 Mawrth 2026.

Diolchwyd am yr adroddiad

Mewn ymateb i gwestiwn ynglŷn â beth fydd yn digwydd i bortffolio eiddo Gwynedd wedi i'r cwmni buddsoddi IMCo gael ei sefydlu, nodwyd bod proses tendr wedi digwydd ac y byddai'r buddsoddiadau eiddo yn rhan o gronfeydd newydd eiddo Partneriaeth Pensiwn Cymru, gyda cronfa eiddo'r Deyrnas Unedig, a cronfa eiddo 'impact'.

Mewn ymateb i sylw ynglŷn â chais i'r sesiynau hyfforddiant gael eu recordio fel bod modd cyfeirio'n ôl atynt os byddai problem mynychu, nodwyd y byddai'r sylw yn cael ei gyfeirio at yr Awdurdod Lletyol i sicrhau bod dolennau i'r recordiadau ar gael i'r Aelodau.

Mewn ymateb i sylw am swyddogaethau a chyfrifoldebau'r Pwyllgor yn newid o ganlyniad i sefydlu cwmni buddsoddi IMCo erbyn Mawrth 2026, awgrymwyd cynnal sesiwn penodol i rannu gwybodaeth am y sefyllfa erbyn cyfarfod nesaf o'r Pwyllgor

PENDERFYNWYD

Derbyn yr adroddiad a nodi'r wybodaeth

6. CYFRIFON DRAFFT CRONFA BENSIWN GWYNEDD AM Y FLWYDDYN A DDAETH I BEN 31 MAWRTH 2025

Cyflwynwyd, er gwybodaeth adroddiad gan y Rheolwr Buddsoddi yn darparu manylion gweithgareddau ariannol y Gronfa Bensiwn yn ystod y flwyddyn a ddaeth i ben Mawrth 31ain 2025. Amlygwyd bod y cyfrifon (drafft) yn destun archwiliad sy'n cael ei weithredu gan Archwilio Cymru

Adroddwyd bod y cyfrifon yn dilyn ffurf statudol CIPFA gyda'r canllawiau yn dehongli beth sy'n cael ei gyflwyno yn y cyfrifon ac nad oedd dim newid yn y canllawiau o'r flwyddyn ddiwethaf.

Mynegwyd bod y flwyddyn wedi bod yn un prysur i'r Gronfa a gwaith yn parhau mewn buddsoddi yn ehangach gyda Partneriaeth Pensiwn Cymru. Cyfeiriwyd at grynodedb o gyfrif y Gronfa gan dynnu sylw at ychydig o amrywiadau wrth i'r cyfraniadau a'r buddion gynyddu wedi i weithwyr dderbyn codiadau cyflog ac wrth i'r pensiwn gynyddu gyda CPI. Adroddwyd bod cynnydd yn y costau rheoli wrth i werth yr asedau gynyddu ac o gyflwyno mathau gwahanol o fuddsoddiadau i'r portffolio e.e. credyd preifat. Ategwyd bod cynnydd o oddeutu £160 miliwn yng

ngwerth marchnad y gronfa sy'n unol a'r cynnydd graddol blynyddol.

Eglurwyd bod incwm buddsoddi'r gronfa wedi codi yn sylweddol a buddsoddiadau ecwiti wedi perfformio yn gryf ac o ganlyniad wedi cynhyrchu incwm sylweddol. Ategwyd fel rhan o'r dyraniad asedau strategol, buddsoddwyd mwy yn y cronfeydd incwm sefydlog ac isadeiledd.

Tynnwyd sylw at y nodiadau statudol oedd yn rhoi manylion pellach tu ôl i'r ffigyrau, gweithgareddau'r Gronfa, a Phartneriaeth Pensiwn Cymru, gan fod y Bartneriaeth yn rhan flaenllaw bellach o waith y Gronfa.

Ategodd y Pennaeth Cyllid ei fod, fel Swyddog Adran 151 wedi arwyddo'r cyfrifon drafft gan dderbyn eu bod yn adlewyrchiad cywir a theg o'r sefyllfa.

Diolchwyd am yr adroddiad

Sylwadau yn codi o'r drafodaeth ddilynol:

- Bod yr adroddiad a'r cyfrifon yn fanwl ac yn hawdd eu deall
- Bod y fformat yn un da
- Bod y cynnydd (growth) yn galonogol

PENDERFYNWYD:

Derbyn a nodi Datganiad Cyfrifon Cronfa Bensiwn Gwynedd (yn amodol ar archwiliad) ar gyfer 2024/25

7. CYNLLUN ARCHWILIO CRONFA BENSIWN GWYNEDD 2025

Croesawyd Osian Roberts (Archwilio Cymru) i'r cyfarfod.

Cyflwynwyd Cynllun Archwilio Manwl ar gyfer 2025 oedd yn cyflwyno'r tîm archwilio, y ffioedd a llinell amser y gwaith fydd yn cael ei gwblhau yn ystod y flwyddyn, yn unol â'r cyfrifoldeb statudol sydd ganddynt fel archwilwyr allanol. Amlygwyd y byddai gwaith archwilio'r datganiadau ariannol yn cael ei gwblhau yn ystod mis Medi gyda bwriad o gyflwyno adroddiad ar y datganiadau yn ystod Tachwedd 2025. Cyfeiriwyd at y risgiau gan nodi bod y risg o wrthwneud gan reolwyr yn risg gorfodol sydd wed ei gynnwys ymhob cynllun yng Nghymru fel rhan o weithdrefn Archwilio Cymru.

Diolchwyd am yr adroddiad ac i Osian Roberts am fynychu'r cyfarfod.

PENDERFYNWYD

Derbyn a nodi'r wybodaeth

8. CAU ALLAN Y WASG A'R CYHOEDD

PENDERFYNWYD cau'r wasg a'r cyhoedd allan o'r cyfarfod yn ystod y drafodaeth ar yr eitemau canlynol gan ei fod yn debygol y datgelir gwybodaeth eithriedig fel y'i diffinnir ym Mharagraff 14 o Atodiad 12A o Ddeddf Llywodraeth Leol 1972 Gwybodaeth ynglŷn â thrafodion ariannol neu fusnes unrhyw berson penodol (yn cynnwys yr awdurdod sydd yn dal y wybodaeth hynny).

Mae budd cyhoeddus cydnabyddedig mewn bod yn agored ynglŷn â defnydd adnoddau cyhoeddus a materion ariannol cysylltiedig. Cydnabyddir fodd bynnag fod adegau, er gwarchod buddiannau ariannol cyhoeddus fod angen trafod gwybodaeth fasnachol heb ei gyhoeddi. Mae'r adroddiadau yn benodol ynglŷn â phroses gaffael arfaethedig. Byddai cyhoeddi gwybodaeth fasnachol sensitif o'r math yma yn gallu bod yn niweidiol i fuddiannau'r Cyngor a'i bartneriaid drwy danseillio cystadleuaeth. Byddai hyn yn groes i'r budd cyhoeddus ehangach o sicrhau'r allbwn cyfansawdd gorau. Am y rhesymau hyn mae'r materion yn gaeedig er y budd cyhoeddus.

9. GWASANAETH YMGYSYLLTU ROBECO - ADRODDIAD YMGYSYLLTU 01.10.2024-31.12.2024

Cyflwynwyd adroddiad chwarterol yn crynhoi'r gwaith mae Robeco (Darparwr Pleidleisio ac Ymgysylltu PPC) yn cyflawni ar ran y Gronfa Bensiwn, gan gynnwys y gwaith ymgysylltu. Diolchwyd am yr adroddiad

Sylwadau yn codi o'r drafodaeth ddilynol:

- Bod angen gwybodaeth am amserlen datblygu polisi cynnydd (escalation). Byddai'r amserlen yn ddefnyddiol ar gyfer ateb cwestiynau sydd yn codi yn aml
- Rhaid sicrhau bod y polisi yn effeithiol - bod angen diffiniad eglur o pryd fydd ymyrraeth yn amserol
- Bod yr adroddiad yn un positif ac wedi ei gyflwyno yn dda
- Awgrym i ystyried defnyddio symbolau (emoji) fel modd o ddenu sylw at uchafbwyntiau o fewn yr adroddiad

PENDERFYNWYD

Derbyn a nodi'r wybodaeth

Dechreuodd y cyfarfod am 2.00 y.h. a daeth i ben am 2.35 y.h.

CADEIRYDD